



咸陽星野上應井鬼之分在玖嶮山南渭水北山水俱陽故名西北高厚東南寬平地屬古

雍州周為畢國春秋為秦始皇都焉漢初改為新城以高祖葬於此名長陵元鼎叁年

改名渭城屬右扶風郡後漢省晉咸和中石趙置石安縣苻秦兼置咸陽郡隋郡縣俱廢

唐武德貳年復置咸陽縣屬京兆郡五代宋金因之元省入興平尋復置自明及

本朝均隸西安府

政績錄

明

郭在豐開封太康人永樂年以孝廉任咸陽令孝以化民廉以律已人咸感德後陞西甯苑

馬寺丞

王瑾安肅人正統間任咸陽興學勸農鋤強植善以憂歸民不忍其去請於朝特旨起服

及秩滿民復請之詔加陸品秩仍留任後陞延安府知府

孟統山東甯陽人弘治年任壹錢不受百廢俱興循良著聞後陞漢中府知府

底蘊河南考城人正德間任公清仁恕循良馳譽累遷至甘撫右副督御史

周欽山西人嘉靖間任有嚴有翼不煩不擾均丈邑田民永賴之

宋國相濟南人萬歷年任雅度清操士民愛戴

王嘉瑞直隸人萬歷間任愷悌愛人不畏權貴民為立生祠焉



張枚四川人有學識兼擅幹才任事剛果聽斷英明訓士勸農愛民潔已又有趙恒折清  
州人興學校毀淫祀禁豪強勤政愛民期年而治士民皆愛慕之

邵玉霖廣西河池人同治元年由雒南縣知縣調任值叛回蹂躪全陝以咸陽附郭必欲得之以關  
西安據城東蘇家溝為巢分兵駐城西馬家堡營壘相望數拾里日夕肉薄攻城玉霖率  
勵士民誓以死守募鄉勇伍百人以其族邵均統之均亦沈毅果敢治守具督訓練得士  
死力城中回民數百家謀應賊悉擣斬之心始定被攻凡拾捌月城卒無恙賊平玉霖以  
勞平均叙功補吳堡縣典史

### 兵事錄


咸陽為輔要地關右有事首為兵衝歷代戰爭具詳史策遵例不贅惟同治初元回匪之亂  
人民死亾流離之酷諸大帥推陷廓清之烈實百年來絕大兵事惜征戰事蹟不入擋冊私  
家亦無紀述者舊零落復無可訪詢僅就所傳聞紀之不能備也

同治元年肆月狃匪倡亂於同州陸月入咸境時承平日久鄉鎮皆弛備聞賊至則相率狂  
竄獨縣令率士庶城守耳肆境悉賊有也縣城南帶渭河北距畢原稍遠賊乃據城東叁拾  
餘里之蘇家溝渭城灣為老巢以別營駐城西馬家堡伺隙攻城未幾

欽差大臣勝官保督師入秦前鋒馬總兵失名率馬步軍至與賊戰勝之殺傷千餘人已而回黨  
膺集彌漫平野不見其際勝帥坐西城樓指麾諸軍攻馬家堡大戰官軍敗賊追奔至

城下譁譟震城屋再戰再北城人大懼勝帥移營省城旋北去將軍多忠勇公隆阿奉

命代之未入關謀知咸陽圍急先遣副將雷失名率千伍百人馳救所將卒皆百戰選鋒視回



茂如也至則攻馬家堡克之以馬總兵駐守賊既失據遂猛撲縣城期必取初勝帥之來也  
以銅大礮貳鐵大礮壹遺城中至是卒賴以守礮容羣子貳百餘藥稱是壹發輒斃數  
拾百人是日賊隊互貳拾里肉薄攻城城上更番轟擊礮身洞赤以水沃之復發殲賊無  
算雷軍亦至賊大奔併入渭城灣築營與官軍相守當是時粵匪亦自南山竄入殺戮  
焚掠與回等壹城之外殆無居人焉會多軍抵同州連戰大捷盡奪其堅巢乘勝而西勢如  
風雨攻渭城灣蘇家溝皆壹鼓破平之枕屍數拾里回西奔董子原粵匪東奔盤屋多軍窮  
追出境縣界始清自被攻至此已拾捌月徵多公則城不守矣咸陽向稱富庶村落整齊居  
廬柳比舊家池館相望亂後悉毀於火至今不能復舊野望蕭然又流亡罕歸客民紛  
至漢唐醇厚之俗亦稍稍雜焉

耆舊錄

周

壞駟赤字子徒孔門弟子

漢

田千秋長陵人為高廟殿郎會衛太子為江充所譖廢千秋訟其冤武帝感悟召見拜大  
鴻臚數月為丞相封富民侯事具漢書本傳

班彪字叔皮性沉重好古初從隗囂知囂有異志著王命論後避地河西竇融深敬待之  
光武雅聞彪才召舉司隸茂才拜徐令事具漢書序傳後漢書本傳

第五倫字伯魚有義行遭世亂依險固築營壁以拒盜銅馬赤眉之屬皆不能下領長安



市無阿枉百姓悅服遷蜀郡太守所舉吏多至玖卿貳于石擢司空薨詔賜祔器倫天性峭直質慤少文位至叁公以貞白稱事具後漢書本傳



樂恢字伯奇父為縣吏得罪於令恢年拾壹俯伏寺門晝夜號泣令聞而矜之即解出恢長好經學閉戶精誦不交人物遂篤志為名儒性廉直介立拜議郎遷尚書僕射會竇憲出征恢上書切諫不聽乃歸鄉里憲風州郡迫脅遂飲藥死眾庶痛傷之事具後漢書本傳

班固字孟堅長陵人彪長子也年壹能文及長博貫載籍明帝朝典校秘書續成父所著漢書又作兩都賦與頌記凡若干篇事具後漢書本傳

趙岐字邠卿少明經多才藝徵拜議郎遷太僕持節撫慰關東著孟子章句及叁輔決錄事具後漢書本傳


唐

崔敦禮字安上以節義自將善辭令進止觀者皆竦太宗時拜兵部尚書知肆夷情偽屢使突厥前後建明允會事机進中書令卒陪葬昭陵事具唐書本傳

王綝字方慶以字顯武后時屢遷廣州都督論者謂治廣未有如綝者進平章事卒謚曰貞綝博學練朝章著書貳百餘篇尤精叁禮門人次其酬復為雜禮答問事具唐書本傳

金

蕭貢大定中進士調涇陽觀察判官有美政左丞董師中右承楊百通薦其文學除漢林修撰上書言時政伍弊言路肆難詞意切至累官戶部尚書好讀書老而不倦註史記壹百卷謚曰文



明

姚顯正統甲子舉人在太學參上封事皆闕異端崇正道安禳社之謀時上欲幸隆福寺又上言力諫名震天下後令齊東武城棗縣皆有善政入祀名宦用薦擢太僕丞事具明史單宇附傳顯生平講知行並進之學關中學者宗之祀鄉賢祠

王獻正德癸未進士授御史時咸陽渭水屢漲為城郭患獻家居與當事者籌畫築城外堤岸至今永賴遷山東道多惠政膠萊有遺愛祠又入名宦祠

王汝成邑廩生有孝行萬歷年建坊旌表

許汝清名山縣教諭仲同子隨父在任父病嘗湯藥衣不解帶焚香告天乞以身代父疾愈汝

清竟以憂勞嘔血而死名山播紳及諸生哀而嘉之贈以詩詞立孝子碑於墓前

張希賢邑庠生幼知孝友安貧守義志介行端縣尹匾其門曰清修孝士

張秀理間昇子也昇居官清白不為子孫生產計秀卓然自立凡鄉黨婚喪弗克舉者即

資助之書生清貧者給以膏油諸所施為悉中禮度遠近無不感服

國朝

劉元勳東賀里人順治己亥進士染齡失怙哀戚如禮稍長穎悟絕倫歷官至淮徐道政聲

卓然調山西驛糧道嚴禁官馬累民著為令民利賴之委賑大同發粟處有槐壹株民懷其德

號為劉公槐尋致任歸居鄉以和敬率閭巷扶掖後進孜孜若不及適逢歲稔周給里黨為同族

代輸舊稅鄉鄰至今感頌



殷化行字熙如其先晉人徙居咸陽康熙庚戌武進士授守備擢臺灣總兵官從大將軍費揚古  
征噶爾丹奮勇直前聲震山谷噶爾丹僅以身遁化行復具疏請率師深入殄殲根株

御賜深沉節制匾額奉

旨建坊世襲拖沙喇哈番陞廣東提督致仕歸以詩酒自娛有古儒將風

李麟字振公其先世延安人也徙居咸陽以行伍從將軍趙良棟南征累著戰功授九江副將時

歲饑米貴爭事搶掠麟單騎撫慰持節開倉全活甚眾大兵西討調赴軍前參贊悉中機宜

臨敵陷陣功最多擢固原提督尤長撫綏授內大臣世襲拜他喇布勒哈番年老致仕旋里尤樂

培植學校士林稱之事載本省通志大府上其事實於國史館

蕭光蘭安穀里人事親至孝歲饑承父志散金出粟存活千人父歿廬墓三年餘巡撫黃爾

性請旌之載入通志

賈元正在廊里人天性孝友陸歲喪父哀慕如成人事母田氏色養備至母歿廬墓性至介有

乾州客韓連寄麥菜拾餘石久不至親送其家客已亡其子不知也述其故授之而去又拾井陘王

萬良百金訪而還之酬金堅不受大吏具事狀請旌奉

### 旨建坊

張添聞本姓聞名佳質楚人也直流寇屠城徙內鄉老銀工張國泰得不死因從張姓更名添聞

入咸陽籍後聞楚中母兄尚在往探之為母製棺衾而返其兄至咸陽欲偕返楚添聞曰母有兄

備養張父老無子安忍棄之後世耕讀傳家雍正擢年大吏訪聞命纂其事入縣志

蕭宏士安穀里人事父母有禮諸弟幼撫之成立性好施濟周恤貧乏齋醮喪不遺餘力大吏具



狀請旌奉

旨建坊

蕭聯芬監生祖曰光蘭出粟散金傳載通志父宏士周急好義聯芬承兩世志益加擴焉捨半助耕施藥療疾婚喪緩急無不恤也又設學誨人孜孜不倦鄉里至今稱之

谷傳聲字玉堂乾隆丙午舉人授直隸知縣歷任拾餘年嚴請託絕餽遺閱書肅然勤于治民鄉僻良莠勤惰皆知之隨事勸懲循聲卓著及旋里囊橐蕭然以清白吏稱

負志重字子任河南里人邑庠生篤於友愛怡怡如也兄志貴以誤殺人當抵罪兄弟爭繫獄慟哭於庭觀者感泣將定讞志重飲兄致醉自往應罪事聞官府議從輕比流甘肅高台縣令重其學品脫囚延之教讀限滿歸家卒年捌拾餘

康登岫河南里人性孝謹事母兄備得其懽愛厚族里遇有婚葬不舉及乏牛馬者造門而請無不周恤遭回亂鄰村逃難來者計口授粟屢月不怠保全極多

楊生芝安業里人乾隆甲午舉人家富好施邑人欠債數萬金常體親心焚券契鄉里化之希有爭者

劉樹滋蕭相里人附貢生賦性肫誠親病寢食俱廢親歿歆粥叁年常捐修文廟整葺書院歲飢出粟周貧屢空不恤其好義如此

姜建白良里人事親色養備至歲歉常負米奉親處家容忍玖世同居共染拾餘口屢為同里息訟代貧戶輸官租邑人服其高誼

李紹蓮陳良里人邑庠生孝友性成事親先意承志親歿廬於墓側常創立成陽鄉試會



館費逾萬金獨任合邑卷價又設義塾課貧寒子弟成就甚多

姬肇勤安業里人聖裔事親養志聞戚黨貧乏無不周恤素習岐黃人以病告即為診視施藥

餌焉

馮竣字仰崧兩寺渡村人道光丁未進士授雲南文山知縣治行甚高吏民悅服居鄉設義塾築堡城宗族有不能婚葬者無不盡力資助以成其美

李凌閣字勳卿正陽所人道光貳拾捌年歲歉捐粟周貧乏又代完逋賦光緒丁丑大饑率族出千金以襄賑設義塾以待貧不能具束脩者人皆德之

王潤蕭相里人咸豐己卯舉人孝友純至人無閒言家中資自奉極儉至施貧困恤孤寡未嘗少有吝色本程未至敬之學教授生徒循循善誘每有心得輒記於冊著隨記冊卷

隨記詩卷卷訓家語壹卷前學政吳大澂以品端學粹入告奉

旨旌孝義焉

趙國楨正陽所人廩貢生讀書稽古發揮精義兄弟同居肆拾年無間言

劉光蕢字煥唐光緒己亥領鄉薦為志好學於書無所不讀主講涇干味經各書院訓課有

方不分門戶多所成就所著有論語時習錄大學古義孝經本義孟子性善脩萬物圖說

詩大旨書微意立政臆解禮記學記臆解讀通鑑日記其指陳時務則有國債罪言濠蘆私

議日本速成學講義諸書凡數拾種尤留意算術今陝士多以精測算為各學堂教習皆光蕢

弟子也主講味經時立刊書處多刻正經正史有裨學人前學使柯逢時奏獎國子監學士

銜光緒貳拾柒年學使沈銜復以學識過人不求聞達入告奉



賞加五品銜家居時募設天閣村馬庄鎮西陽村魏家泉尹家等處義學今皆為初等小學堂其勸學之勤壹時罕其匹焉

節義

漢

班昭者彪之女也適曹世叔早寡誓不改嫁兄固著漢書未竟而卒和帝令昭踵成之號曹大家作女誡染篇事具後漢書

明

負謝氏在郭里人拾染適里人負崇義夫亡遺幼子族人惜其年少欲令改適謝覺即毀壺指天靡他孝養繼姑旦暮紡績撫幼子成人守節肆拾餘年始終如壹

劉范氏在郭里劉承恩妻也年貳拾伍夫亡范上事翁姑下撫孤弱守節伍拾餘載崇禎貳年旌表建坊月給粟米冬給花布卒年玖拾餘以上載入通志

國朝

李鄧氏延陵里李建功妻也嫁貳拾餘日而夫亡鄧孝奉翁姑綜理內外政井井有法翁姑沒喪葬如禮訓子入成均屢贍戚族貧乏及寒士之膏火不給者里人公匾其門以志閭德

高郭氏高恒太妻也年拾染歸於高生壹子而夫亡郭守節事親撫孤成立姑欲奪其志涕泣自陳卒不他適家寒甚以紡績度日守節伍拾餘年

劉烈廷陵里人許婚程鳳儀未嫁而程早夭父母欲改婚女聞知即詣家請翁姑誓無悔志事親孝敬始終如壹夫死以閉奉

旌表



人類戶口

咸陽漢回雜處自同治元年回亂後悉逐出境今惟漢人壹種

乾隆道光間城鄉凡壹萬伍千柒百餘戶共拾壹萬叁千捌百餘口近年迭遭兵燹加以饑饉門戶蕭條生齒凋殘現在土客民凡壹萬叁千柒百陸拾陸戶共陸萬玖千伍百伍拾陸名口

旗戶無



畢原姬氏自周元公以來至今後裔姬栢襲封歷捌拾貳代

秦徙天下豪富拾貳萬戶於咸陽漢高祖徙齊諸田并楚昭屈景及諸功臣後於新城又

世世徙吏貳千石及富人豪傑於諸陵年久譜牒無存無從考核

柏李村李氏系出唐中書令西平王李晟元和拾壹年涼國公愬平蔡州後移家於此涼國公

墓在縣西鄉柏里村墓柏大數拾圍香聞里餘人稱為香柏樹李家自涼國至今傳叁拾壹

代子孫世守儒業譜牒具存

兩寺渡馮氏周文王拾伍子畢公高之後畢萬封魏食采馮城因以為氏至元代馮熙以子爵

錫土於此族姓繁衍亂後猶存柒拾餘家據舊志



宗教 實業

咸陽士夫崇尚儒學民間信奉釋道亂後寺院多燬僧徒道侶人數寥寥  
家與齊民雜處近經驅逐無復奉謨罕慕德教者矣



歐人教堂伍所

一城內西街福音堂壹所

一陳良里救世堂壹所 去城貳拾捌里

一劉家溝救世堂壹所 去城叁拾里

一穆家溝天主堂壹所 去城叁拾里  
上叁處均在東鄉

總耶蘇天主教徒約百餘人

綜計成人為士者拾之壹農拾之柒工拾之壹商伍方雜處本境自販惟花土油粟肆宗餘物運

自他省皆客民為之通計商戶亦約拾之壹



地理

咸陽在省城西北去省治西安府伍拾里

東至咸甯界肆拾伍里西至興平界貳拾伍里南至鄠縣界貳拾里北至涇陽界叁拾捌里

東南至長安界貳拾伍里西南至藍屋界叁拾里東北至高陵界伍拾里西北至醴泉界叁拾伍里  
合縣東西南北肆鄉共為拾里肆鎮陸堡

拾里 肆鎮陸堡統在拾里內

在廓里 陳良里 白良里 蕭相里 延陵里 安業里 渭城里  
東賀里 安穀里 河南里

肆鎮

窰店鎮 在縣東叁拾里屬渭城里

北杜鎮 在縣北叁拾里屬安業里

馬莊鎮 在縣西北叁拾里屬蕭相里

南賀鎮 在縣東北貳拾里屬東賀里

陸堡

河南街堡 在縣南貳里屬河南里

東南坊堡 在縣西拾伍里屬陳良里

馬跑泉堡 在縣西貳拾伍里屬陳良里



押枝堡

在縣北貳拾伍里屬延陵里

畦村堡

在縣東北肆拾里屬東賀里

北村堡

在縣北貳拾伍里屬延陵里

古蹟

釣魚臺

在縣西南拾伍里周太公垂釣於此

杜郵亭

在縣東拾里內有白起祠

細柳營

在縣西貳拾里漢周亞夫屯兵處

棘門

在縣東北拾陸里

正陽洞

在縣東肆拾里相傳漢鍾離權修道處

陵墓

周

文武成康陵周公太公魯公墓皆在縣北畢原上去城拾伍里城內北街有文武成康廟

恭王陵

在縣西北王社村去城拾貳里

漢

高祖長陵

在縣東蕭相里去城叁拾伍里

惠帝安陵

在縣東張馬村去城肆拾伍里

景帝陽陵

在縣東楊家村去城肆拾肆里

昭帝平陵

在縣北新莊村去城拾伍里



元帝渭陵 在縣北大寨村去城拾叁里

成帝延陵 在縣西北石村去城拾伍里

哀帝義陵 在縣西底王村去城拾肆里

平帝康陵 在縣西北雙陵寨去城貳拾里

鄴侯蕭何墓 在縣東北王村去城叁拾里

平陽侯曹參墓 在縣東北瓦劉村去城貳拾伍里

絳侯周勃墓 在縣東蔣村去城貳拾伍里

安國侯王陵墓 在縣東王家斜去城貳拾伍里

案縣境陵墓尚多但無碑記不能質實

### 橋梁

西渭橋壹名便橋據圖經橋與長安西門相對西門名便門故名橋曰便門橋度舊基

當在縣城東百步餘然不能確指矣今夏秋以舟渡冬時河水則集船為橋故亦以渡

名關中捌景曰咸陽古渡即此地

豐橋在縣東南叁里跨豐水上壹名叁里橋

### 山水

咸陽無山而諸原類皆有山體故或謂之山

畢原在縣北叁里南北數拾里東西貳百餘里周畢公高封此壹名畢郭原文王卒於畢郭故陵在焉

鮮原在縣東貳拾里詩大雅度其鮮原即此



高陽原在縣東南貳拾里秦始皇作阿房宮依此原

矩陰原在縣西南貳拾里水經注渭水與澧水會於矩陰山內禹貢雖指謂即矩陰原也

渭水源出隴西渭源縣鳥鼠同穴山東流自興平縣界西來至尹家崖入縣境即澧水如渭處

又東北為馬家寨即泥渠入渭處又東北經縣城南依城東流過漁王村即澧水如渭處又

東北入高陵界總計渭水經咸陽地界東西陸拾餘里縣治以東可行大船運貨往來治西

惟小舟應渡而已

澧水出終南山豐谷內北流自鄠縣界南來至郭村入縣境至漁王村東入渭總計澧水

經咸陽地界南北叁拾餘里

漆水為澧水支流由縣屬小張村入境經鄭家村入渭

澧水出鄠縣南山澆谷自鄠縣界南來至馬家堡北入縣境拾餘里入渭

泥渠源出鄠縣南化羊谷自鄠縣界南來至王道村西北入縣境至鈞魚臺入渭

新開河為泥水支流由縣屬東江頭村西入境至黃家堡歸泥入渭

白馬河亦澧水支流由縣屬捌里庄入境北流至沙口村入渭

沙河亦澧水分流由長安開水韓家畝村流至捷魚屯入境西北流至黃堡西歸泥入渭

蓮花池渠在縣東南柒里即柒里橋渠俗名泥河出康家寨西南蓮花池北經柒里舖西又

北入於渭

馬跑泉在縣西貳拾伍里志載唐太宗獵此馬渴跑地泉湧出今泉石上有馬足跡履當

時所鑿以表異也泉大旱不竭霖雨不溢澄泓澈底浪噴珠璣列之拾景居民引



以溉田

李村泉在縣西北拾里近李氏之村因名

雙泉在縣北叁里畢原下其水甘冽旁有藥王洞疾病祈禱膜乾求雨輒應

